

PADRE NOSTRO CHE SEI NEI CIELI

(POEMETTO SENZA PRETESE)

In doe sto mi de ca, anche s'el ciel l'è bell
A guardà per ari se ved minga de stell.
Sarà 'l smog - me cunten - ma mi disaria
Che l'è putost la mia miopia.
Per fortuna gh'è 'n'altra manera
De vedé i stell anca se l'è no sera.
Sul computer gh'è l'Internet
Che te fa vedè 'l ciel bel ciar e net.
Inscì som andàa, corios, a esplorà l'Univers
Ma de rivag in fond gh'è minga sta vers.
'Na meraviglia, mia cara gent!
Pianeta, stell, galassie...de vess mai content!

"Ma 'n doe l'è 'l Signor - me som domandaa -
Che tutt 'sto ben di Dio propri Lu l'ha creaa?
E per chi l'ha traa in pée tutt 'sto gibilé, tuti 'sti mond
Che sbarluscen e giren e se ved minga 'l fond?"

Alora ho pensàa che anca Lu l'è come tuti i papà,
Ai papà come ai mamm ghe pias sta scondu e se divertissen
A vedè i so fiolett che, prima se stremissen,
Poeu resten lì a boca 'verta, incantaa
A vedè i belé che g' han regalaa.

Semm nassu su d'on pianetin
Che l'è propri bell, ma l'è piscinin
'Na baleta che num me par granda, coi so continent,
Ma in confront a i alter l'è propri nient.
Quand l'ha creada el noster Papà
L'ha inventada 'me 'na bela cuna
El So a scaldala e a ninala la Luna
Inscì donn e omen vorendos ben
Ghe stan tucc denter felis e seren.
Poeu intorna a la cuna gh'è la nostra stanzeta
(Num me par granda, ma per Lu l'è 'na robetta!)
E l'ha taccaa su, come fusser paret
In sul firmament stell e comet.
Inscì me purisna de andà a coriosà
Tuti 'sti mond per vedè com'in faa.
Quel che a ca nostra l'è a portada de man
El scoprissom man man che cressom coi an:

El verd di praa con tanti bei fior
E mar e montagn coi so color
Pessit e pessot e per l'aria tanti uselitt
Che volen content e fan cip e cip.
Tuta 'sta beleza l'ha fada 'l Signor
Per daghela a num che semm el so amor
Per mi e per ti l'è 'l so regal
De tegn de cunt e rispetal.
Come se fa a no ringrazial?

A vedè la Tera insci piscinina
Confront ai mond che l'ha miss in vedrina
Me vegn in ment quel ch' el diseva
L'antico veggent, el profeta Michea:
Betleemm eren sì e no quater ca
Ma 'l Signor propri lì 'l m'è vegnù a cercà
Tra tuti i mond che Lu l'ha creaa
L'ha scernì domà quest per vegnim a troà.
Come i mamm e i papà coi so fiolitt
Ghe fan tenereza pussé in piscinit
Pussé vun l'è picol, pussé 'l ghe voeur ben
E in 'sta manera ghe la dà d'intend
A chi el se cred grand e 'l var propri nient.

L'è per quest che quand emm guastàa
Tuta 'sta' beleza che Lu 'l ma regalaa
Coi noster malan, coi noster pecàa
Lu de Persona l'è vegnu a tiram foeura
De tutt el mal ch'emm combinaa.

El savi ben in doe l'è 'ndà
A cercà 'na Mama perché 'l so Fioeu
In mezz a num el trovass la so ca.
L'ha cattà foera tra tut' i don la pussé bela
Con l'anima lustra pussé d'ona stela.
Quand che pensi ch'el Padron del mond
Che l'ha faa 'l ciel e la Tera e tutt l'Univers
L'è vegnù a cercam num che s'erom pers
E 'l s'è scondu per tanti mes
Dent al venter d'ona brava Tosa
Prima ammò che l'andass in sposa
Al so Om che ghe voreva insci ben...
E poeu l'è nassu 'me on poerett
In d'ona stala in mezz i besti, beritt e cavrett

Me vegn on magon ch'el me toeu 'l fiaa!
E guardi 'l ciel, i stell e 'l firmament
E disi: "Signor, tutt quest t'e creaa
Per famm vedé come Te see potent
E poeu Te vegnet, Te nasset come 'on violin
Per vegnom incontrà, per stamm visin?"

Me car Signor, fa che tuta la gent
Te riconoscen per quel che Te sée
Un vero Papà che per famm content
De voremm ben ghe n'ha mai assée!

Anca mi Te voeri ben.
Tegnom tacaa, tegnom arent.
Tegnom arent tucc: semm pora gent!
Da quei che Te cerca, fass ritrovà
Che quei che Te cerca no, tei vee Ti a cercà.
Com'el pastor la sua pecorela
Che la s'è perduda, ma per Lu l'è la pussé bela
Fin che tucc starem insema
E saltarem content de stela in stela
Te vedarem, finalment!

COME TE SEE BELL !

O PADRE NOSTRO, CHE TE STEE IN CIEL !!!

Riferimenti biblici:

- Salmo 8 “Quando vedo i tuoi cieli, opera delle tue dita, la luna e le stelle che Tu hai fissato:
Che cos’è l'uomo perché te ne ricordi...”
- Isaia 45,15;” Veramente Tu sei un Dio nascosto, Dio d’Israele...”
- Michea 5,1ss “E tu, Betlemme di Efrata, cos’ piccola per essere tra i villaggi di Giuda,
da te uscirà Colui che dovrà essere il Dominatore d’Israele”
- Riferimento liturgico: Antifona per le feste della Madonna.
“Colui che i cieli e i cieli dei cieli non possono contenere, nel Tuo grembo ha preso dimora”

Don Arnaldo Martinelli : “Padre Nostro che Sei nei Cieli” (febbraio 2014)